


---

## Milazzo Stefano

---



Stefano Milazzo nasce ad Alcamo il 21 ottobre del 1959.

Sposato con Fiorenza Grillo, padre di due figlie: Sara ed Enrica. Amante della lingua siciliana, da sempre ama dire ed esprimere pensieri in maniera metaforica. Lavora nel settore agricolo come produttore, commercializza personalmente i suoi prodotti. Non ha mai pubblicato le sue opere.

## *Via Umma "na strata pi tutti"*

Trasi furzatamente di 'na punta, si metti a firriari, si 'ncudduria, acchiana, scinni, fa' soccu ci dici di fari (la umma). Si misi pi tappu quannu niscì la prima vota, pinzava d' essiri forti e attuppari sta umma mischina, ma li marvaggi eranu forti assai, e trasi comu tanti sfilazzuna, cu l' occhi la vidia firriari di nintra da umma marliritta, senza putilla firmari! Mi vinni un lampu 'n testa e pinzavu lu cannolu, iddu è lu tradituri! è iddu chi ci duna a campari, ma s'è veru chi ti staiu chiudennu e mi dici cunn'ha curpa, e chi si sulu cumannatu, dimmi!! Cu è chi ti cumanna? Fammi capiri! chi-stu av'ha essiriu un' omu senza anuri, comu è iddu ci ni semu tanti, nun c' è chi fari, penza si fussi na figghia tò a firriari dintra na umma stinnicchiata, frisca e longa assai, comu ti sintissi tu di patri? Penzu chi t'arraggiassi l' arma, e lu sennu pirdissi!

Circamu allura di stari attenti e quartiati, e quannu viremu ummi peri peri, tagghiamuli senza pietà, damu accusi facennu la libertà a tanti sfilazzuna sfortunati.

---

## *Li Cinniruseddi*

---

*(RIVOLTE LIBICHE-TUNISINE-EGIZIANE E QUANT'ALTRO)*

O Fratuzzi mei cinniruseddi, cu l'occhi sbarrachiatu di rabbia e di paura, jè vulissi essiri ddocu cu vuatri, e spada cu spada scugnari sti lintumi mali misi. la rina, chi 'ntà l'aria vola e vi 'mpruvigghia, è comu 'na mola assai fina, idda servi p'ammulari la vostra ragiuni, e annurvari l'occhi traditura. La curpa è puru nostra, n'aviti a pirdunari! Avemu fattu finta di nun capiri, la ventri a li porci âmu lavatu, e iddi di veru porci s'hannu cumpurtatu. La fimmina - omu chi la scienza e lu 'ntellettu, avvicina sempri chiù a l'onniputenti, sta dannu a tutti quanti 'nta stu munnu lu specchiu pi putirisi spicchiari, e si cu la facci lorda nun voi arristari, l'acqua ci voli pi sgrasciari, si l'hai è cosa bona e ti ni prei, ma si lu puzzu è siccu e ti distruri, l'acqua a circari, e t'ha riscattari, si cu la facci 'ngrasciata un vò arristari. O fratuzzi scinniruseddi, lu me cori un v'abbannuna, stiau virennu chi cu tanti morti e suffirenza, li sorgivi stannu dannu, chi biddizza! La terra è vostra, e vostru avà es-siri l'anuri, quannu po'dunanu chiddi giusti, pi tutti quanti arrifrisari; nuvatri semu cà, pronti a darivi li quartari.



Ma comu è accussì bedda! Cu la fici? Chiossà mi vaiu avvicinnanu, e chiossà mi sbalurdisci, l' amici di viaggiu chi eranu cu 'mmia arristaru 'ncantati a stà vista quasi divina, lucia comu lu pau, e ni canuscia, ni l' avissimu misu 'mmucca pi caramela, p' assapurari tuttu stu misteru!

A firrià 'ntunnu a idda, tutti cosi eranu sicchi, era assai difficili spiegarsi stu sistema, pigghiamu na dicisioni pi darici un nomu, "TERRA" dissi lu picciriddu ch' era cu nuvatri, TERRA l'amà chiamari, lu 'nnuccenti purtari si la vulia, ma lu cumannanti di l' astronavi circa lu tempu pi capiri, astutà tutti li mutura, la tagliava e pinzava: " po essiri ch'è circata e si cantia 'n menzu a stu disertu senza fini? e si anchi fussi veru, comu fici arrivari cà? Mutura unn' avi! Oltri a essiri bedda di 'nfuddiri! È mistiriusa assai e 'mpirugghiata sta terra frisca di nomu! Forsi è megghiu nun la nociri e jiri ninni, purtannuni 'nta li nostri menti lu ricordu, d' aviri vistu la casa di lu DIU ONNIPUTENTI!

————— (*Gesto: "Ascidda" Ipocrita* ) —————

Lu iornu di lu gniutticu arrivau, Duminica si chiama, pi sapillu l' ascidda, si lu teni strittu strittu, pinzannu di capiri soccu c' è scrittü.



---

## *La Muccunata*

---

Muccuni, lu mussu si strinci, e si eccà 'n fora, muccuni, pi diri anticchia, muccuni, ognunu di nuatri po' essiri un muccuni, cu iddu si campa, senza d' iddu si campa lu stessu, la società chi ni susteni, spissu voti va avanti, a via di muccunati, vriogna!!!

---

## Matteo Pagano

---



Matteo Pagano nasce a Castellammare del Golfo, il 10/11/1942, dove vive con sua moglie, Maria Di Benedetto (insegnante in pensione). Diplomato presso la Scuola Marinara, ha lavorato come impiegato comunale, fino al pensionamento.

Da sempre appassionato di poesia, scrive in siciliano e tratta delle vicissitudini della vita quotidiana, gli affetti familiari e l'amore.

Casteddamhari mia quantu si bedda,  
di la muntagna 'nzina a la marina,  
di li cerri, lu scogghiu chianu a lu casteddu,  
c'è puru la granni spiaggia,  
Vitaloca e c'è Scupeddu e li faragghiuna,  
nun avemu a scurdari cosi di biddizzi veru rari.  
Su' beddi puru li Pitrazzi,  
li Casi Novi, la Maronna Scala,  
Santa Rita e la Matrici.  
Ma stu paisi, lu Signuri veru beddu lu fici!  
Però, 'na cosa tristi c'è di diri  
pi stu paisi veramenti beddu:  
chi chiddi chi cumannanu foru senza ciriveddu.  
Sapiti ch'ammucciaru a lu casteddu?  
N'ammucciaru 'na cosa veramenti rara,  
era lu vantu di la nostra marina,  
facìa chiù fiura lu casteddu,  
era 'na cosa veramenti fina!  
Si vi ricordati, era la vasca rigina.  
'Nta stu paisi veramenti raru,  
taliannulu di notti tuttu 'lluminatu  
pari veru un prisepiu cunzatu,  
allura, grida forti Casteddammari!  
Pi li to' ricchizzi riclamari,  
accussì, chiddi chi ficiru stu dannu,  
hannu a capiri di fari riturnari  
la vasca rigina a Casreddammari.



---

## *Lu ritrattu to*

---

Haiu lu ritrattu to e lu tegnu sempri 'n manu,  
lu vasu sempri e mi tegnu lu rispiru;  
è un ritrattu pi mia tantu caru,  
chi lu portu sempri appressu di cuntinuu.  
Taliannulu, 'na lacrima mi scinniu chianu chianu,  
mi stuiu l'occhi e lu taliu ancora  
e lu cori 'nta lu pettu mi suspira.  
Batti forti lu me cori pinzannu a tia  
e nun ti scordu chiù ciuriddu meu,  
eu ti curtivu comu fussi un ciuri raru,  
picchè lu ciauru to lu sentu ancora.  
Nun sapennu stari chiù senza di tia,  
l'amuri meu sempri si rinnova,  
taliannu lu ritrattu to sempri di cuntinu,  
tegnu lu cori meu chiù sirenu  
e penzu sempri a tia  
amuri meu luntanu.

## *Ci sunnu fimmini vilinusi*

A li picciotti schetti un cunsigliu ci vogghiu dari:  
di stari attenti a 'ddi fimmini  
cu la lingua sciota e lu ciriveddu finu;  
di starici tri passi arrassu di luntanu,  
picchè 'un hannu dignità di essiri umanu  
e sunnu ruvinusi e chini di vilenu.  
Sunnu furbi e maliziusi  
e acchiappanu un poviru cristianu  
puru si si senti un malantrinu,  
ci fannu agghiuttiri vilenu,  
facennuci passari un malu distinu.  
Perciò, stati attenti durante lu vostru caminu  
a li fimmini cu la lingua sciota e lu ciriveddu finu,  
picchè cercanu sulu dunni c'è dinari, libirtà e sempri fistinu;  
'un ci 'nteressanu l'affettu e l'amuri d'un essiri umanu,  
parennuci lu munnu tuttu chianu,  
ma ci sunnu acchianati e pinninu,  
chi puru iddi si ponnu truvati dintra un grossu pantanu,  
passannu puru un malu distinu,  
'un truvannusi chiù nenti pi li manu.

## *Di passaggiu semu*

'N capu stu munnu di passaggiu semu  
e poi comu la cinniri squagghiamu,  
allura picchi beni nu facemu  
e sempri la superbia nui purtamu?  
Chi tanti fratuzzi semu  
nuddu ci pinzamu  
e chi semu tutti figghi  
di Diu Patri suvranu.  
Niatrì, tanti fratuzzi puvireddi avemu  
e ogni vota chi li 'ncuntramu,  
facemu finta chi 'un ni li videmu.  
Ma ci pinzamu nuddu chi muremu?  
e unu cu l'atru cca ni disprizzamu...  
Ma quannu semu 'nta 'ddu munnu arcanu,  
la superbia ddà ni la scurdamu  
e quannu è giunta l'ura chi muremu,  
appressu nudda cosa ni purtamu!  
E a la fini chi pissidemu?  
Tanticchia d'ummira  
sutta 'n arvuliddu di giraniu.



---

## Sicilia bedda

---

Sicilia bedda, circunnata di lu mari,  
fusti biniditta di lu Signuri,  
tu, a tutti li furisteri fai 'ncantari  
pi li biddizzi toi, terra d'amuri.  
Cu' è chi ti veni a cuntimplari,  
'un ti po chiù scurdari:  
lu ciauru di li zagari, d'aranci e li to' ciuri.  
Cu' è chi ci nasciu e s'appi alluntanari  
senti la to mancanza,  
facennulu siffiriri e arrè voli turnari.  
Triangulu 'ncantatu, vasata di lu sulì,  
si chiù bedda di 'na perla!  
Pusata 'nta lu mari, li to' città 'mpurtanti,  
cumpresu l'abbitanti, cu l'ospitalità  
e la so bedda cultura  
ti fannu fari chiù fiura.  
Missina cu Catania,  
Siracusa e Agrigentu  
cu Palermu capitali.  
Cu' ci veni 'na vota  
mai chiù ti po scurdari!